

## ABENDUALDIKO II. IGANDEA (A)

### Otoitza

Jainko errukitsu ahalguztiduna,  
 lur honetako egintzek ez gaitzatela lotu  
 zure Semearen bidera goazenok,  
 eta jainko jakinduriaren erakuspenek eraman gaitzatela  
 zure Semearekin bat egitera.  
 Zurekin eta Espiritu Santuarekin.

I. IRAKURGAIA: Is 11, 1-10

*Zuzen erabakiko du apalaren auzia.*

Isaias Profetaren liburutik

Egun hartan, kimu berri bat sortuko da  
 Jeseren zuhaitz hondotik,  
 muskil berri bat loratuko haren zainetik.  
 Haren gainean Jaunaren espiritua kokatuko da:  
 jakinduri eta adimen espiritua;  
 kontseju eta sendotasun espiritua;  
 ezaguera eta Jaunaren beldur espiritua.  
 Jaunaren beldur espirituak beteko du.  
 Ez du auzia itxuraz bakarrik erabakiko,  
 ezta epaituko ere entzuten duenaz.  
 Zuzen erabakiko du apalaren auzia,  
 eta zintzoro epaituko, herriko behartsuak.  
 Bere ahoko zigorraz joko ditu gogorrek  
 bere ezpainetako arnasaz hilko gaizkileak.  
 Zuzentasuna izango du gerrian uhal,  
 leialtasuna, giltza gainetan gerriko.  
 Otsoa bildotsarekin biziko da,  
 eta lehoi nabarra antxumearekin etzango;  
 txekorra eta lehoikumea elkarrekin larratuko dira;

eta haurtxo bat izango da haien artzain.  
 Behia eta hartza batean larratuko dira,  
 eta haien umeak elkarrekin etzango;  
 lehoiak eta idiak batean jango dute lastoa.  
 Bularreko haurra sugezulo ondoan jostatuko da,  
 eta bularra utziberriak bere eskua  
 suge gorriaren zuloan sartuko du.  
 Nire mendi santu osoan  
 ez da, ez gaitzik, ez hondamenik, ikusiko;  
 Jaunaren ezagueraz beteko baita lurraldea,  
 itsasoa urez beterik dagoen bezala.  
 Egun hartan Jeseren zuztarreko muskil berria  
 herrien ikurrintzat jarria izango da;  
 herriak haren bila etorriko dira,  
 eta haren tokia ospetsua izango da.

ERANTZUN SALMOA: Sal 71, 1-2. 7-8. 12-13. 17

**R/. Zuzentasuna garatuko da haren egunetan,  
eta bakea ugari betieran.**

Emaiozu, Jainko, zure auzia erregeri,  
 zure zuzentasuna errege semeari.  
 Zaindu beza zure herria zuzentasunez,  
 eta zure gizagaixoak zuzenbidez. R/.

Zuzentasuna garatuko da haren egunetan,  
 bakea ugari ilargia itzali artean.  
 Nagusi izan bedi itsasotik itsasoraino,  
 Ibaitek lehor mugaraino. R/.

Onik aterako baitu oihuka ari den jende xehea,  
 eta laguntzailerik ez duen dohakabea.  
 Apalarentzat eta behartsuarentzat izango du errukia,  
 salbatuko du behartsuen bizia. R/.

Betirako izan bedi haren izena,  
 eguzki argia adina haren izenaren iraupena.  
 Lurreko leinu guztiak

harengan izango dira bedeinkatuak,  
herri guztiek dohatsu aitortuko dute hura. R/.

II. IRAKURGAIA: Erm 15, 4-9

*Kristok gizaki guztiak salbatzen ditu.*

San Paulo Apostoluak Erromatarrei

Senideok: Lehengo Idazki guztiak gure erakusbiderako idatzi ziren, geure iraupenez eta Liburu Santuak ematen digun pozez, itxaropen izan dezagun. Iraupenaren eta pozaren Jaungoikoak eman diezazuela, elkarrekin iritzi bereko izatea, kristauei dagokien bezala; bihotz batez eta aho batez gora dezazuen Jaungoikoa, Jesu Kristo gure Jaunaren Aita.

Horrela, bada, harrera on egiozue elkarri, Kristok zuei harrera on egin dizuen bezala, Jaungoikoaren aintzarako. Hau esan nahi dizuet: judutarren zerbitzari egin zela Jesu Kristo, arbasoei egindako agintzariak betetzen dituen Jaungoikoaren leialtasuna egiaztatzeko; eta beste aldetik, harrera on egiten diela jentilei, Jaungoikoari aintza eman diezaioten, Beraren errukiagatik. Honela baitio Liburu Santuak:

«Ospatuko zaitut atzerrietan, Jauna,  
goretsiko dut zure izena».

EBANJELIOA: Mt 3, 1-12

**Aleluia:** Lk 3, 4b. 6

R/. Aleluia.

V/. Urra ezazue bidea Jaunarentzat,  
zuzendu Haren bideskak;  
eta ikusiko dute guztiek  
Jainkoaren salbamera. R/.

*Bihotz-berri zaitetze,  
hurbil da eta zeruetako erreinua.*

Jesu Kristoren Ebanjelioa San Mateoren liburutik

Egun haietan, Joan Bataiatzailea Judeako basamortuan agertu zen, hotseginez: «Bihotz-berri zaitetze, hurbil da eta zeruetako erreinua». Honengatik esana zuen Isaiasek:

«Mintzo bat oihuka ari da basamortuan:

Urta ezazue bidea Jaunarentzat,

zuzendu Haren bideskak».

Joanek gamelu-larruzkoa zuen jantzia; eta gerrian, larruzko gerrikoa; eta basalangosta eta basaeztia zituen janari.

Jerusalendik, Judea osotik eta Jordan aldetik harengana joaten zen jende guztia; haiek aitortzen zituzten beren bekatuak, eta hark bataiatu egiten zituen Jordan ibaian. Baina Joanek farisear eta saduzear asko bere bataioa hartzera zetozkiola ikusirik, esan zien: «Sugekumeok! Nork erakutsi dizue, gainean duzuen haserreari ihes egiten? Emaitzazue, bihotz-berritzeari dagozkion fruituak. Eta ez esan zeuen baitan: "guk Abraham dugu aita". Hara zer esaten dizuedan: Jainkoak harri horietatik ere sor diezazkioke seme-alabak Abrahami. Ezarri diote aizkora zuhaitzondoari; fruitu onik ematen ez duen zuhaitza, hondotik ebaki eta sutara botako dute.

Nik urez bataiatzen zaituztet, bihotz-berri zaitezten; nire ondoren datorrena, ordea, ni baino ahaltsuago da, ni ez bainaiz inor Haren oinetakoak eramateko ere; Hark Espiritu Santuaz eta suz bataiatuko zaituzte. Eskuan dauka sardea; larraina garbituko du eta garia mandiora bilduko; lastoa, berriz, itzali ezin daitekeen sutan erreko du».

### **Oparigaien gainekoa**

Biguin zaitzatela, Jauna,  
gure otoitz eta eskaintza apal hauek,  
eta, gure merezimenturik ezin aitatu dugunez gero,  
zure errukiak lagun diezagula.  
Jesu Kristo.

Prefazioa: Abendualdikoa.

### **Jaunartze ondorengoa**

Arimen janari honek aserik,  
otoitzean gatozkizu, Jauna:  
erakusiezaguzu, sakramentu honetan parte hartu dugunoi,  
lurreko gauzak zentzuz erabiltzen  
eta zerukoei jarraitzen.  
Jesu Kristo.